

伯之器則財堪什夫伯夫之長者也

雖有舟與無所乘之雖有甲兵無所陳之使

民復結繩而用之

事少民朴雖結繩足矣

甘其食美其服安其居樂其俗

內足而外無所慕故以其所有為美以其

所處為樂而不復求也

隣國相望雞犬之音相聞民至老死不相往

來

○ 民物繁夥而不相求則彼此皆足故也

○ 信言不美章第八十一

信言不美美言不信

信則為實而已故不必美美則為觀而已

故不必信

善者不辯辯者不善

以善為主則不求辯以辯為主則未必善

知者不博博者不知

有一以貫之則無所用博學而日益者未

必知道也

聖人無積既以為人已愈有既以與人已與

多

聖人抱一而已他無所積也然施其所能

以為人推其所有以與人人有盡而一無

盡然後知一之為貴也

○ 天之道利而不害聖人之道為而不爭

勢可以利人則可以害人矣力足以為之

則足以爭之矣能利能害而未嘗嘗能為

能爭而未嘗爭此天與聖人所以大過人

而為萬物宗者也凡此皆老子之所以為

書與其所以為道之大畧也故於終篇復

言之

道德真經註卷之四

正一天師清微弟子 道教學術

○ 子年四十有二謫居蜀州筠雖小州而多

古禪刹四方遊僧聚焉有道全者住黃蘗

山南公之孫也行高而心通喜從子遊嘗

與子談道予告之曰子所談者子於儒書

已得之矣全曰此佛法也儒者何自得之

予曰不然子忝聞道儒者之所無何若強

以誣之顧誠有之而世莫知耳儒佛之不

相通如胡漢之不相諳也子亦何由知之

全曰試為我言其畧子曰孔子之孫子思

子思之書曰中庸中庸之言曰喜怒哀樂

之未發謂之中發而皆中節謂之和中也

○ 者天下之大本也和也者天下之達道也

致中和天地位焉萬物育焉此非佛法而

何顧所從言之異耳全曰何以言之子曰

六祖有言不思善不思惡方是時也就是

汝本來面目自六祖以來人以此言悟入

者太半矣所謂不思善不思惡則喜怒哀

樂之未發也蓋中者佛性之異名而和者

六度萬行之總目也致中極和而天地萬

物生於其間此非佛法何以當之全驚喜

曰吾初不知也今而後始知儒佛一法也
 子笑曰不然天下固無二道而所以治人
 則異君臣父子之間非禮法則亂知禮法
 而不知道則世之俗儒不足貴也居山林
 木食澗飲而心存至道雖為人天師可也
 而以此治世則亂古之聖人中心行道而
 不毀世法然後可耳全作禮曰此至論也
 是時子方解老子每出一章輒以示全
 輒歎曰皆佛說也子居筠五年而北歸全
 不久亦化去逮今二十餘年矣凡老子解
 亦時有所判定未有不與佛法合者時人
 無可與語思復見全而示之故書之老子
 之末大觀二年十二月十日子由題

道德真經新註序

能一

自然之道靜故天地萬物生於其中人為萬
 物之主故與天地為三才焉老君在西周之
 日故秉道德以救時俗道者清淨自然之道
 也德者以法久而失修而得之謂之德也故
 曰道大天大地大亦大是謂域中四大焉
 蓋王者法地法天法道之三自然妙理而理
 天下也天下得之而安故謂之德凡言人屬
 者耳故曰人法地地法天天法道法自然
 言法上三大之自然理也其義云法地地如
 地之無私載法天天如天之無私覆法道道
 如道之無私生成而已矣如君君臣臣父父
 子子之例也後之學者不得聖人之旨謬妄
 相傳凡二十家注義皆云人法地地法天天
 法道法自然即域中五大矣與經文乖謬
 而失教之意也豈王者只得法地而不得法
 天法道乎又況地法天天法道法自然義
 理踈遠矣源流既撓支派遂昏或宗之為神
 仙書或語之以虛無學論者非云先黃老而
 後六經乃淺俗之談也殊不知六經乃黃老

之枝葉爾余少得旨要故辯而釋之蓋清心
 養氣安家保國之術也